

Image not found

Lirica Medievale Romanza/sites/all/themes/business/logo.png

Published on *Lirica Medievale Romanza* (<https://letteraturaeuropea.let.uniroma1.it>)

Home > BERNART DE VENTADORN > EDIZIONE > Quan l'erba fresch'e·lh folha par > Tradizione manoscritta > CANZONIERE K > Edizione diplomatica

Edizione diplomatica

Bernartz del uentadorn.

Quan lerba fresquel fuolla par. Ela flors botonel uerchan. Eil rossignols autet et clar. Leua sa uotz emou son chan. Ioi ai de lui eioi ai de la flor. Ioi ai de mi et de midonz maior. Daus totas partz son de ioi claus esens. Qua sel es iois que totz autres iois uens.

Tant am midonz ela tenc car. Etant la doppete la reblan. Qanc de mi no(n) lausei parlar. Ni ren nol quier ni nol deman. Per so il sab mal ema dolor. Eqan li platz mi fai ben et honor. Eqan li platz eu soferc men ab mens. P(er) so calei no(n) ueingna blastens.

Ben la uolgra sola trobar. Que dormis on fezes senblan. Per uer lenbles un douz baisar. Puois non uaill tan quieu loil deman. Per dieu domna pauc esplei tam damor. Uase(n) lo temps eperdem la meilleur. Parlar degram ab cubertz entre cens. Epuois no(n) ual forsa ualgues nos sens.

Sieu sabes la ien encantar. Miei enemic foran enfan. Que ia us no(n) saubra triar. Ne dir ren quens tornes adan. Adoncs sai eu que uira la iensor. Esos belz oillz esa fresca color. Ebaisera la boca en totz cens. Si que un mes iparegra lo dens.

Ailas com muor de consirar. Que mantas ues en enconsir tan. Lairo men poirian portar. Que ren no(n) sabria ques fan. Per dieu amors ben trobas uensedor. Ab pauc damic e ses autre seingnor. Car una uez tan midonz no(n) destrens. Abanz quieu fos del deserier este(n)s.

Merauill me com puosc durar. Que nol demostre mon talan. Qant eu uer mi donz null esgar. Li seu beil oill tan be(n) lestan. Per pauc me teing car eu ues lei no(n) cor. Si feira

Image not found

https://letteraturaeuropea.let.uniroma1.it/?q=sites/default/files/styles/330_px/public/K%2020%292%29_26.jpeg&itok=VaBI_W4o

Image not found

https://letteraturaeuropea.let.uniroma1.it/?q=sites/default/files/styles/330_px/public/K%20283%29_18.jpeg&itok=JZOdSQqv

eu si no(n) fos per paor. Quanc no(n) ui cors
miels ta-
illat ni de peins. Ad obs damar sia tangreu
ni lens.

- letto 459 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizione-diplomatica-2366>